



USAID
HUSI POVU AMERIKANU



Presiza Reavaliasaun ba Dezempeñu Unidade Espesial Polísia Tuir Natureza no Misaun PNTL

Mahein Nia Lian Nú. 114, 29 Agustu 2016



**Relatóriu Fundasaun Mahein Nia Lian ne'e suporta husi povu Amerikanu liu
husi Ajénsia Estados Unidos ba Dezenvolvimentu Internasional (USAID)**

**Vizaun husi autor sira ne'ebé expresa iha publikasaun relatóriu sira ne'e la
reprezenta vizaun husi Ajénsia Estados Unidos ba Dezenvolvimentu
Internasional (USAID)**

Fundasaun Mahein (FM)

Website: www.fundasaunmahein.org

2016



Kontiudu sira

| | |
|--|----|
| Kontiudu sira | 2 |
| Introdusaun | 3 |
| Metodolojia | 3 |
| Karakteristika PNTL | 4 |
| UEP PNTL | 5 |
| Insidenti ne'ebé involve membru sira BOP-UEP | 7 |
| Tambasa sempre involve bebeik husi BOP-UEP? | 7 |
| Dezafiu dada-dalan ba profesionalismu | 9 |
| Rekomendasaun | 10 |
| Bibliografia | 11 |



Introdusaun

Sei fresku hela iha ita hotu nia hanoin kona-bá brutalidade husi membru sira Polisia Nasional Timor-Leste (PNTL) nian. Iha inisiu fulan Agustu 2016, Fundasaun Mahein (FM) hasai ona komunikadu imprensa ida relata insidenti grave ne'ebé involve husi membru PNTL ida tiru mate mane ida ho kondisaun moras mental iha Munisipiu Covalima. Antes ne'e mosu ona insidenti seluk ne'ebé halo agresaun fiziku hasoru comunidade bai-bain, estudante, taxista, médiku, jornalista, entre membru PNTL rasik no abuzu seksual involve husi membru Batallaun Ordem Públika (BOP) – Unidade Especial Polisia (UEP) PNTL.¹

Nune'e mos asaltu sira entre membru husi instituisaun PNTL no hasoru membru FALINTIL-Força de Defesa de Timor-Leste (F-FDTL) nian. Resposde ba insidente ne'e ulun boot F-FDTL nian ho lian ne'ebé kro'at no halo públiku hakfodak tebes, dirize ba kazu membru PNTL husi BOP-UEP nian halo agresaun fiziku hasoru membru F-FDTL ida iha Balibar Dili, Maiu 2016. Liu deit semana balu nia laran fulan Juñu 2016 insidenti ne'ebé hanesan akontese iha munisipiu Ainaru membru ida husi F-FDTL halo agresaun física hasoru membru PNTL ida.² Prosesu ba kazu sira ne'e la'o dadauk ironiku aumenta insidenti seluk iha Maliana – Bobonaro membru ida husi BOP-UEP PNTL halo agresaun física hasoru membru F-FDTL ida.³

Relasiona ho asuntu sira iha leten ne'e, FM alerta ona katak disiplina no dezempeñu husi membru PNTL tenke hetan atensaun sériu husi ulun boot insituisaun nian. Maibe brutalidade ironiku aumenta maka'as liu tan no maioria involve husi membru sira BOP-UEP PNTL nian.

Problema ne'e saida, nune'e BOP-UEP PNTL sai preokupante husi públiku kona-bá sira nia atuaun ho brutalidade ka ho forma sira agresaun física?

Metodolojia

Relatóriu ne'e adopta metodolojia liu husi análise literatura, lei, dokumentu, relatóriu no rekolla informasaun sira husi media. Nune'e mos rezultadu monitorizasaun FM nia ba kazu asaltu no krime ne'ebé involve membru husi membru PNTL no F-FDTL. Konklui relatóriu ida ne'e liu husi metodu ne'ebé FM adopta maka *Security Sector Discussion (SSD)*.

¹ Relatoriu Fundasaun Mahein, Agustu 2016. Polisia "Main Hakim Sendiri" no Brutalismo Ironiku Aumenta Maka'as Liu-tan. Disponivel iha: <http://www.fundasaunmahein.org/2016/08/08/polisia-main-hakim-sendiri-no-brutalismo-ironiku-aumenta-makaas-liu-tan/>

² Relatoriu Fundasaun Mahein, Jullu 2016. Irregularidade Involve Membru F-FDTL - PNTL Presiza Atensaun Sériu "labele hateke matan sorin deit". Disponivel iha:

<http://www.fundasaunmahein.org/wp-content/uploads/2016/07/MNL-NU-113.pdf>

³ Notisia Timor Post, 24 Agustu 2016.



Karakteristika PNTL

PNTL, forsa seguransa ida ne'ebé iha misaun atu defende legalidade demokrátiku, garante seguransa sidadaun no bens nian no proteje direitu sidadaun nian tuir termu ne'ebé estabese iha Konstituisaun no iha Lei sira. Tuir estratéjia no filozofia polisiamentu nian PNTL iha karakteristiká polísia komunitária, maski nia organizasaun, dixiplina, instrusaun no estatutu pesoál nian sei tuir natureza militar, PNTL sei la konstitui forsa natureza militar ida.⁴ Nune'e iha kompetensia rasik iha kualidade nu'udar orgaun investigasaun kriminal no tuir lei hala'o funsaun iha autoridade judisiál kompetente nia okos.⁵

Nune'e iha tinan 2014 PNTL pasa ona Planu Estratéjiku 2014 – 2018 ho nia modelu polisiamentu hakoak filozofia polisiamentu komunitariu, liu husi adopta doutrina VIP, *Vizibilidade* – vizibilidade aas polísia nia halo comunidade sente seguru. *Involvimentu* – involvimentu comunidade nia halo comunidade sente hola parte. *Profesionalismu* – hatan ho profesionalismu hodi nune'e servisu polísia nian satisfas comunidade.⁶

Vizibilidades, hatudu presenza polísia nian liu husi atividades polisial iha comunidade nia leet iha fatin hotu-hotu, hodi nune'e comunidade sente seguru no hakmatek. *Involvimentu*, involvimentu comunidade nian iha lala'ok seguransa hodi nune'e eduka ona comunidade sai mos na'in ba asaun sira seguransa. Nune'e seguransa la'os responsabilidade PNTL nian deit, maibe responsabilidade ema hotu-hotu nian hodi asegura espirtu parseriadu ne'ebe forte liutan. *Profesionalismu*, hatudu matenek iha ita nia atuasaun no atendentu, nakonu ho disiplina hatene lori-an no tau-an iha comunidade nia leet. Nomós respeita hirarkia Komandu nian, hodi asegura integridade, kredibilidade no prestiju instituisaun PNTL.⁷

Siginifika filozofia polisiamentu komunitaria aplika ba membru PNTL hotu-hotu. Polisiamentu komunitaria la refere deit ba departamentu ka seksaun espesifiku ida iha PNTL nia laran maibe refere ba aproximasaun entre PNTL ho comunidade. Maske nune'e sei iha interpretasaun diferente husi membru PNTL sira katak polisiamentu komunitariu hala'o deit husi pesoal sira ne'ebé koloka iha Departamentu Polisia Komunitaria Nasional no iha munisipiu sira.⁸

FM hakfodak oituan ho situasaun ida ne'e. Portantu Lei Organika PNTL nian pasa tiha ona iha tinan neen liu ba maibe membru PNTL sira seidak kompriende diak kona-bá lei ne'e rasik. Partikularmente polisiamentu komunitaria nu'udar filazofia

⁴ Lei Organika PNTL/2009, artigu 1, n^o. 1 no 2.

⁵ Lei Organika PNTL/2009, artigu 2 no 3 n^o. 2.

⁶ Planu Estratejiku Polisia Nasional Timor-Leste (PNTL) 2014 -2018.

⁷ Planu Estratejiku PNTL tinan 2014 – 2018.

⁸ Xefe Departamentu Polisia Komunitaria Nasional (DPKN) Superintendente Asistente Polisia Boavida Ribeiro iha Enkontru Komitiva Jestaun Programa ba Polisiamentu Komunitaria ho parseiru dezenvolvimentu sira iha Kuartel Jeral PNTL, Dili. Loron 11 fulan Maiu tinan 2015. Sita mos iha relatoriu Fundasaun Mahein nian disponivel iha:

http://www.fundasaunmahein.org/wp-content/uploads/2015/07/MNH-Nu.08_30072015_Politika-Implementasaun-POLKOM_Versaun-Tetum.pdf



PNTL nian. Nune'e mos Planu Estratéjiku PNTL 2014 – 2018 pasa iha tinan rua liu ba, iha ne'ebé dezeña modelu polisiamentu hakoak filozofia polisiamentu komunitaria, liu husi adopta doutrina VIP (Vizibilidade, Involvementu no Profesionalismu).⁹

FM fiar katak Lei no Planu Estratéjiku PNTL ne'e rasik la ho sosializasaun ne'ebé diak ba membru PNTL sira iha unidade, departamentu, serbisu no seksaun seluk. Tanba ne'e aproximasaun sira husi membru PNTL durante ne'e kestiona husi públiku no rezulta pratika sira la ho aproximasaun polisiamentu komunitariu.

UEP PNTL

UEP nu'udar unidade rezerva ida ne'ebé Komandante Jerál maka komanda, no kaer komandu operasionál.¹⁰ Nune'e mos nia organizasaun lidera husi Komandante ida ho nia diviza Superintendente Xefe ida no ajuda husi Segundu Komandante¹¹ ida ne'ebé hetan nomeasaun liu husi despaxu husi Komandante Jerál, no iha membru PNTL ne'ebé iha formasaun espesializadu.¹²

Iha âmbito kompetensia ba unidade ida ne'e nian tuir Lei Organika PNTL/2009 artigu 26 n^o. 1 hatete UEP iha kapasidade hodi:

- a) Mantein no estabelese fila fali orden públika;
- b) Rezolve no jere insidente krítiku;
- c) Halo intervensaun ho tátika bainhira iha situasaun ne'ebé iha violénsia, perigu boot liu, kompleksu liu ka risku boot liu;
- d) Halo seguransa ba instalasaun ne'ebé sensível no ba eventu boot sira, no protesau ba entidade boot sira;
- e) Dezativa esplozivu sira;
- f) Protesaun no sokorru
- g) Prepara no haruka forsa ba misaun internasionál.

UEP mos iha kapsidade seluk reforsa Komandu Distritál sira hodi hala'o funsaun ne'ebé sira simu bainhira sira nia kapasidade la to'o ka bainhira natureza ameasa ka konfliktu ezije. UEP nian kolabora ho Força Armada iha misaun sira ne'ebé preve iha Sistema Integradu Seguransa Nasionál nian, ne'ebé defini iha Lei Seguransa Nasionál, liu-liu kona-ba vijilánsia no kontrolu fronteira terrestre nian, bainhira hatan ba dezastre no kalamidade natural no iha situasaun seluk ne'ebé justifika katak uza forsa konjunta, liu-liu bainhira iha ameasa revolta kontra Estadu Direitu nian.¹³

⁹ Relatoriu Fundasaun Mahein, Jullu 2015. Disponivel iha:
http://www.fundasaunmahein.org/wp-content/uploads/2015/07/MNH-Nu.08_30072015_Politika-Implementasaun-POLKOM_Versaun-Tetum.pdf

¹⁰ Lei Organika PNTL/2009, artigu 26, n^o. 1.

¹¹ Lei Organika PNTL/2009, artigu 27, alinea b.

¹² Lei Organika PNTL/2009, artigu 26, n^o. 2

¹³ Lei Organika PNTL/2009, artigu 26 n^o. 3 no 4.



Formasaun ba UEP iha Komandu PNTL ho nia objetivu hodi objetivu atu garante funsionamentu internu ida ke diak ba Unidade Especial Polisia, atu Unidade ida ne'e bele garante kumprimentu misaun sira ne'ebé sira simu.¹⁴

Nune'e mos UEP nia funsaun hanesan unidade reserva ida, ho efetivu variável, ne'ebé atua tuir orden husi Komandante-Jeral, iha situasaun reforsu ba Komandu Distrital sira ka iha situasaun kumprimentu misaun autónoma. Portantu UEP iha elementu sira ne'ebé preparadu no treinadu atu kumpri misaun sira hanesan, rezolusaun no jestaun insidente krítiku. Intervensaun tátika iha situasaun violénsia konsertadu ka ho perigu ne'ebé aas, kompleksu no ho risku. Manutensaun no restabelesimentu ordem pública. Seguransa no protesau ba entidade boot. Seguransa ba eventu boot sira. Inklui inativasaun eksplozivu no exekusaun buska preventivu sira. Seguransa instalasaun sensível, preferensialmente iha situasaun apoiu ka reforsu. Preparasaun no projesaun forsa ba misaun internasionál.¹⁵ Organizasaun UEP organiza hanesan tuir mai ne'e:

- a) Komandante;
- b) 2º Komandante;
- c) Batallaun Ordem Pública nian;
- d) Kompañia Seguransa Pesoál nian;
- e) Kompañia Operasaun Espesiál;
- f) Pelotaun Apoiu no Servisu nian

Batallaun Ordem Pública (BOP) maka sub unidade ida ne'ebé konstitui husi kompañia operasaun nian rua, no nu'udar misaun prinsipál tenke hatan ba mudansa grave iha ordem pública, seguransa pontu sensível nian no reforsa Força iha território nasional tomak.¹⁶ Sub unidade ne'e koloka ona kompañia tolu iha teritoriu tomak Timor-Leste nian Kompañia Alfa iha Dili, Kompañia Bravo iha Baucau no Delta iha Bobonaro.¹⁷

Kompañia Seguransa Pesoál (KSP) maka sub unidade ida no nu'udar misaun prinsipál tenke fó seguransa pesoál ba entidade boot sira, nasional no estranjeiru ne'ebé vizita Timor-Leste.¹⁸

Kompañia Operasaun Espesiál (KOE) maka; 1. Kompañia Operasaun Espesiál, sub unidade ida ho kapasidade espesiál hodi lidera bainhira iha situasaun ho Violénsia makas, hodi bele hatan ba aktu terrorismu ka asaun armada ruma, hodi liberta referen (*ema ne'ebé prezu iha krime ida*) no hodi evakua no hamoos instalasaun ne'ebé okupadu husi grupu sira ne'ebé perigozu; 2. Kompañia Operasaun Espesiál iha seksaun ida hodi dezativa eksplozivu.¹⁹

¹⁴ Unidade Especial Polisia PNTL. Disponivel iha: <https://www.pntl.tl/operasaun/uep/>

¹⁵ Hanesan deskreve ona iha footnote 14.

¹⁶ Lei Organika PNTL/2009, artigu 28

¹⁷ Notisia PNTL kona-bá kolokasaun BOP-UEP, Janeiro 2015. Disponivel iha: <https://www.pntl.tl/sub-unidade-bop-loke-liras-iha-bobonaro/>

¹⁸ Lei Organika PNTL/2009, artigu 29

¹⁹ Lei Organika PNTL/2009, artigu 30



Pelotaun Apoiu no Servisu (PAS) nia misaun prinsipál maka atu hala'o servisu administrativu hotu-hotu no fó apoiu ba funsionamentu unidade nian.²⁰

Insidenti ne'ebé involve membru sira BOP-UEP

Iha ne'ebé FM nia monitorizasaun durante períodu 2014 to'o tinan klaran 2016 rejista insidenti sanolu resin rua ne'ebé involve husi membru sira BOP-UEP nian. Atuasaun hahu hasoru komidade bain-bain, lideransa komunitaria, mediku, estudante, jornalista, membru F-FDTL, entre membru sira polísia rasik.

1. Membru BOP-UEP na'in rua hamutuk ho oficial PNTL ida baku nia maluk membru BOP-UEP ida iha Dili, Abril 2014.
2. Membru BOP-UEP ida hamutuk membru seluk husi PROVOST baku mane ida ho naran Bosco Lobato iha Tasi-Tolu – Dili, Maiu 2014.
3. Membru BOP-UEP halo agresaun fizika hasoru membru polísia husi Eskudra Comoro - Dili, Juñu 2014,
4. Membru BOP-UEP baku taxista ida iha Rotunda Comoro – Dili, Juñu 2014.
5. Membru BOP-UEP tiru kilat ba komidade iha festa, iha Santa Cruz – Dili Agustu 2014.
6. Komandu BOP-UEP Baucau tiru joven na'in tolu iha Baucau, Abril 2015.
7. Membru BOP-UEP baku ema iha Audian – Dili, Maiu 2015
8. Membru BOP-UEP no Taske Force ataka malu iha Has-Laran Dili, Agustu 2015.
9. Membru BOP-UEP taa no baku komidade ho naran Mario Soares iha Bairro-Pite – Dili, Novembru 2015.
10. Membru BOP-UEP halo agresaun fízika hasoru médiku ida iha Maliana – Bobonaro, Dezembru 2015.
11. Membru BOP-UEP halo abuzu seksual ba feto ida no halo mos agresaun fizika ba joven ida iha Bairro – Pite - Dili, Janeiru 2016.
12. Membru BOP-UEP halo agresaun fizika hasoru estudante UNITAL ida iha Colmera Dili, Janeiru 2016
13. Membru BOP-UEP halo agresaun fízika hasoru membru F-FDTL ida iha Dili, Maiu 2016.
14. Membru BOP-UEP halo agresaun fízika hasoru membru F-FDTL ida iha Maliana – Bobonaro, Agustu 2016.

Tambasa sempre involve bebeik husi BOP-UEP?

Públiku tomak hato'o bebeik ona ninia lamentasaun kona-bá atuasaun sira husi membru BOP-UEP iha ne'ebé ninia aproximasaun dalabarak identiku ho forsa maske la iha nesessariu uza forsa. Tamba formasaun unidade balu iha PNTL nia laran hanesan UEP ho nia sub-unidade sira forma hanesan grupu paramilitar ida no hakiak dadauk iha PNTL nia laran ho kilat ka arma sufistikadu liu kompara ho F-FDTL. Duke formasaun lei no difikuldade boot ida, lei hotu-hotu iha deit Português

²⁰ Lei Organika PNTL/2009, artigu 31



maioria membru PNTL lahatene Português, formasaun direitus umanus no aproximasaun sira polisiamentu komunitaria. Maske PNTL rasik adopta estratéjia no filozofia polisiamentu nia iha karakteristika polísia komunitaria²¹ no adopta doutrina polisiamentu VIP (Vizibilidade, Involvimentu no Profesionalismu).²² Nune'e mos investimentu ba polisiamentu komunitaria Governu alina ona iha kuadru polítika nasional sira hodi investe ba programa ida ne'e nian no sai hanesan prioridade. Portantu Governu haree katak polisiamentu ida ne'ebé orientadu ba komunitaria no bele estabese relasaun entre polísia ho comunidade besik liu.²³

Dalaruma sira hanoin katak sira iha prevelejiu liu hanesan forsa polísia espesial ida no elite iha postura no organizasaun PNTL nian no hanesan mos pessoal ka grupu ida ne'ebé iha poder no forsa seguransa ida ne'ebé povu tenke tauk.²⁴ Ita bele nota wainhira membru sira husi BOP-UEP nian ho kareta patrulla no la'o iha estrada públiku halai ho vilosidade ne'ebé maka'as no sirine emerjensia nian maske la iha situasaun emerjensia ruma.

Iha sorin seluk, aplikasaun medida disiplinar ba membru PNTL ne'ebé involve iha kazu disiplinar ladun forte no rigorozu. Nune'e mos ba kazu ne'ebé nia natureza kriminal la ho seriu hodi prosesa tuir lei ne'ebé vigor. Impaktu husi ida ne'e motiva liu-tan membru PNTL sira seluk hodi komete kazu ne'ebé hanesan. Dalaruma prosesu ba kazu sira ne'e la'o maibe públiku ladun hatene, tamba PNTL rasik la iha mekanismu ida hodi fo sai medida sira ne'ebé PNTL aplika hasoru kazu sira disiplinar no kriminal. Hanesan kazu membru Kompañia Alfa BOP Dili –UEP nian halo agresaun fizika hasoru membro F-FDTL ida iha Balibar – Dili, fulan Maiu 2016, iha altura ne'eba Komandante Jeral PNTL Komisariu Polísia Julio da Costa Hornay hato'o ona katak ekipa konjunta ida husi PNTL ho F-FDTL sei halo investigasaun no foti medida ne'ebé forte hasoru membru sira ne'e maibe to'o agora prosesu ne'e ninia finalidade to'o iha ne'ebé ita hotu lahatene. Ironiku motiva aumenta liu-tan no komete kazu ne'ebé hanesan husi membru Kompañia Delta BOP Maliana – UEP nian halo agresaun hasoru membru F-FDTL ida iha fulan Agustu 2016. Nune'e mos insidente grave seluk akontese iha munisipiu Covalima iha loron 3 Agustu 2016 membru PNTL ida tiru mate mane joven ida ho kondisaun moras mental.

Ida ne'e potencia boot públiku sei lakon konfiansa ba instituisaun PNTL no estraga esforsu no servisu sira ne'ebé durante ne'e PNTL rasik halo. Maske rezultadu levantamentu husi Fundasaun Ázia tinan 2015 nian hatudu konfiansa husi públiku ba PNTL aumenta signifkativu tebes kompara ho tinan sira antes ne'e.

²¹ Haree Lei Organika PNTL/2009, artigu 1.

²² Planu Estratejiku PNTL 2014 – 2018.

²³ Planu Estratejiku Dezenvolvimentu Nasional (PEDN) 2011 – 2030. P198.

²⁴ Relatóriu Fundasaun Mahein, Julu 2016. Irregularidade Involve Membru F-FDTL - PNTL Presiza Atensaun Sériu "labele hateke matan sorin deit". Disponivel iha: <http://www.fundasaunmahein.org/wp-content/uploads/2016/07/MNL-NU-113.pdf>



Dezafiu dada-dalan ba profesionalismu

Problema sira temi liu dadauk ne'e, refere ba kazu agresaun fizika hasoru membru F-FDTL, publiku no ulun boot F-FDTL nian hatan ona hasoru instituisaun no lideransa PNTL nian ho linguajen ne'ebé kro'at no konsidera iha ona grupu organizadu ida ne'ebé metin iha PNTL nia laran tenta sobu instituisaun rua ne'e. Kazu dahuluk liu, membru sira husi BOP-UEP halo agresaun fizika hasoru membru F-FDTL ida iha Dili fulan Maiu 2016. Vice-Chefe Estado Maior General F-FDTL Brigadeiro General Filomeno de Jesus Paixão konsidera katak "iha esforsu ida sistemátiku husi grupu ida ne'ebé metin ona iha instituisaun PNTL nia laran maka buka atu sobu relasaun entre instituisaun rua ne'e".²⁵

Nune'e kazu ne'ebé akontese iha Maliana husi membru sira BOP-UEP halo agresaun fizika hasoru membru F-FDTL ida iha fulan Agustu 2016. Resposta ne'ebé hanesan husi Chefe Estado Maior General F-FDTL Major General Lere Anan Timur hasoru PNTL katak "deskonfia grupu organizadu iha PNTL nia laran no husu Komandu Jeral PNTL buka investiga no identifika grupu organizadu ne'ebé metin ona iha instituisaun nia laran, instabiliza no halakon ita nia fiar no hakarak estraga instituisaun rua ne'e (PNTL no F-FDTL)".²⁶

Ida ne'e dezafia lideransa foun instituisaun PNTL nian ne'ebé simu kna'ar tinan ida resin ona no promove husi membru PNTL rasik nomos iha esperiensa polisiamentu durante períodu sira Timor-Leste hakat liu hodi impoin lei no regulamentu ba membru sira hodi obdese no aplika. Portantu PNTL nia misaun atu hala'o ka implementa lei no regulamentu sira la'os implementa ameesa, asaltu, forsa fizika, tiru no óho.

Komandu PNTL tenke ho sériu hodi haree ba kazu ne'e ho rigorozu no aplika medida sira tuir regulamentu disiplinar nian no loke prosesu sira kriminal nian. La'os halo auto defeza deit liu husi media tuir relatóriu bosok ida husi nia membru sira. Hanesan kazu ne'ebé akontese iha Dili membru ida husi polisia tranzitu basa hasoru jornalista ida wainhira hasai fotografia ba atividade polisia nian. Komandu Jeral PNTL Segundu Komandante Komisariu Polisia Faustino da Costa rejenta atuasaun ne'e maibe realidade husi gravasaun CCTV nian ne'ebé fo sai iha notisia Radio no Televizaun Timor-Leste (RTTL) lora 27 Julu 2016, hatudu membru ne'e basa duni.

Responde ba protestu sira ne'e, Instituisaun PNTL liu husi Komandante Jeral Komisariu Polisia Julio da Costa Hornay deklara ona liu husi media nasional katak ekipa konjunta ida husi PNTL ho F-FDTL tun ona halo investigasaun ba membru husi instituisaun rua ne'ebé involve iha insidenti sira liu dadauk. Nune'e FM

²⁵ Haree mos relatóriu Fundasaun Mahein, Julu 2016. Disponivel iha: <http://www.fundasaunmahein.org/wp-content/uploads/2016/07/MNL-NU-113.pdf>. Sita mos iha Komunikadu Imprensa ne'ebé Fundasaun Mahein hasai iha Agustu 2016. Disponivel iha: <http://www.fundasaunmahein.org/2016/08/08/polisia-main-hakim-sendiri-no-brutalisku-ironiku-umenta-makaas-liu-tan/>

²⁶ Notisia Jornal Timor Post, 24 Agustu 2016.



rekomenda katak deklarasaun sira nune'e la'os atu kompleta deit notisia media nian maibe tenke implementa ho responsabilidade no akuntabilidade.

Prosesu sira nune'e la'os deit ba kazu ne'ebé hasoru membru F-FDTL, maiba ba kazu hotu-hotu ne'ebé involve membru PNTL hasoru kualker sidadaun. Nune'e, FM suporta dezisaun sira ne'ebé hatur tiha ona husi institusaun rua ne'ebé dadaun ne'e tau regra forte atu hametin disiplina iha sistema no fo suspensaun ba pesoal sira ne'ebé viola regra sira ne'ebé aplika iha Timor-Leste. Maibe mos FM hakarak iha aplikasaun regra ida ne'ebé maka'as liu tan ho sansaun no prosesu penal ba autor sira ne'ebé hakat liu lei ho ordem iha sistema disiplina no lei ne'ebé vigora.²⁷

Dezisaun suspensaun ba autor indisiplina iha setor seguransa nian sei efektivu liu husi aspetu tolu: Dahuluk, kualker membru autor ne'ebé maka viola lei tenke ba hatan tribunal atu fo justisa mos ba ema vitima sira. Daruak, sala saida deit la iha toleransia nu'udar konsekuensia la iha lealdade no disiplina, hodi nune'e maka bele prevene asaun indisiplina seluk iha setor seguransa nian. Ba ikus liu, regra rigorozu sira ne'e hotu, sei halo membru PNTL sira hala'o nia kna'ar ho kompetente, onestu ho lealdade ba instituisaun sai buras ho profesional.

FM fiar katak ho meus sira ne'e, sei iha disiplina ida ne'ebé rigorozu iha Timor-Leste tomak, sei iha benefisiu diak atu ita hetan balansu ba justisa ho disiplina hodi hasa'e profesionalismu iha institusaun polisia ho militar nian.²⁸

Rekomendasaun

1. Ministériu Interior ho Komandu Jeral PNTL persiza hare fila fali política deslokasaun/despositivus BOP-PNTL.
2. Aplika responsabilidade rigorozu husi Komando ba nia membru sira ne'ebé involve krime (ne'e hanesan presaun ba komadante seksaun ho komadante unidade sira, servisu maka'as atu kontrola nia membru sira ne'ebé koloka iha fatin sira ne'ebé ordem hatun ba).
3. Halo revizaun ba tipu formasaun husi GNR, atu nune'e formasaun saida deit bele refléta kna'ar BOP nian ne'ebé hatur tiha ona iha (Lei Organika PNTL/2009 artigu 26 n^o. 1) ho baze formasaun polisial tuir filozofia no karakteristik polisiamentu PNTL nian (polisia komunitaria).

²⁷ Relatório Fundasaun Mahein, 2014. Disponivel iha: <http://www.fundasaunmahein.org/2014/06/16/discipline-in-the-security-system/>. Asesu iha loron 20 Jullu 2016.

²⁸ Relatório Fundasaun Mahein, 2014. Disponivel iha: <http://www.fundasaunmahein.org/2014/06/16/discipline-in-the-security-system/>.



Bibliografia

Lei Organika PNTL/2009, lora 18 fulan Feveiru

Notisia PNTL kona-bá kolokasaun BOP-UEP, Janeiru 2015. Disponivel iha: <https://www.pntl.tl/sub-unidade-bop-loke-liras-iha-bobonaro/>

Planu Estratejiku Dezenvolvimentu Nasional (PEDN) 2011 – 2030

Planu Estratejiku Polisia Nasional Timor-Leste (PNTL) 2014 -2018

Planu Estratejiku Seguransa Interna 2030

Relatóriu Fundasaun Mahein, Agustu 2016. Polisia “Main Hakim Sendiri” no Brutalismu Ironiku Aumenta Maka’as Liu-tan. Disponivel iha: <http://www.fundasaunmahein.org/2016/08/08/polisia-main-hakim-sendiri-no-brutalismu-ironiku-aumenta-makaas-liu-tan/>

Relatóriu Fundasaun Mahein, Jullu 2016. Irregularidade Involve Membru F-FDTL - PNTL Presiza Atensaun Sériu “labele hateke matan sorin deit”. Disponivel iha: <http://www.fundasaunmahein.org/wp-content/uploads/2016/07/MNL-NU-113.pdf>

Relatóriu Fundasaun Mahein, Jullu 2015. Disponivel iha: http://www.fundasaunmahein.org/wp-content/uploads/2015/07/MNH-Nu.08_30072015_Politika-Implementasaun-POLKOM_Versaun-Tetum.pdf

Relatóriu Fundasaun Mahein, 2014. Disponivel iha: <http://www.fundasaunmahein.org/2014/06/16/discipline-in-the-security-system/>. Asesu iha lora 20 Jullu 2016.

Unidade Especial Polisia PNTL. Disponivel iha: <https://www.pntl.tl/operasaun/uep/>